

茶陵州志

同治九年重修

榮蔭
州志

尊經閣藏板

重脩茶陵州志序
同治九年秋余權知州
事甫下車徵志乘掾吏
蔑以應也詢其故則曰
州志之不脩數十年矣

薦紳先生與夫都邑
之士方從事於斯而未
畢也閱數月州志潰於
成邑人士請余序其端
余欣欣然喜曰州固不

可無志牧是州者尤不
可不觀志盖知州者豈
惟是折獄訟力催科云
爾哉必舉一州之事無
乎不知然後謂之知州

然後不愧為知州余始
固懼夫有所不知也於
是乎詢度咨諏究如慮
謨以期□知然耳目有
所不及周採訪有所不

能盡知其偏者或未必
知其全也今幸州志告
成舉所宜知者一一瞭
如指掌將所已知者證
其是非所未知者補其

缺漏庶幾乎可以全知
並可以力行其所知矣
雖然都邑之士獨無所
當知者乎余觀州之先
進明體達用者代不乏

人事業文章光昭史冊
芳風未歇俎豆常新聞
之者皆可感發而興起
都邑之士勉乎哉詩曰
昔吾有先正其言明且

清遠紹旁搜躬行實踐
出為良佐處為純儒將
後之視今猶今之視昔
矣抑又思之隆平之世
風俗移易比戶可封化

導之權操之自上亦賴膠
庠俊秀砥礪廉隅以為
閭里倡也都邑之士勉
乎哉牧是州者尤有厚
望焉

同治十年四月既望
欽加運同銜候補知州署茶
陵州知州蒙古福昌撰

